

**PEMBERITAHUAN PERTANYAAN BUKAN LISAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : YB DATUK HASAN BIN BAHROM [TAMPIN]**

**SOALAN**

Minta **PERDANA MENTERI** menyatakan apakah pandangan Kerajaan terhadap golongan LGBT, apakah program yang telah dan akan dilaksanakan, bagaimana sambutan, sejauh mana keberkesanannya program yang dilakukan itu. Apakah Kerajaan tahu jumlah sebenar golongan LGBT.

**JAWAPAN : YB SENATOR DATUK DR. ZULKIFLI MOHAMAD AL-BAKRI,  
MENTERI DI JABATAN PERDANA MENTERI (HAL EHWAL AGAMA)**

**Tuan Yang di-Pertua,**

Untuk makluman Ahli Yang Berhormat, Malaysia berpegang kepada Islam sebagai agama Persekutuan yang menerapkan kepada nilai-nilai moral berlandaskan adat, budaya dan agama yang sekian lama diterapkan dalam kalangan masyarakat tempatan. Sehubungan itu, golongan LGBT yang melanggar undang-undang perlu diambil tindakan namun pada waktu yang sama perlu ditarbiah dengan cara yang paling berhikmah dan diberi kesedaran untuk kembali ke pangkal jalan.

Adalah menjadi tanggungjawab semua pihak sama ada agensi kerajaan atau swasta termasuklah masyarakat awam untuk mengajak dan membimbing golongan LGBT ini untuk kembali kepada fitrah. Usaha sebegini sangat dituntut dengan harapan mereka boleh melakukan perubahan diri.

Justeru, Jabatan Kemajuan Islam Malaysia (JAKIM) sebagai agensi agama Islam peringkat Persekutuan dengan kerjasama Jabatan Agama Islam Negeri-Negeri, telah mengambil inisiatif menyantuni golongan ini bagi membantu mereka kembali kepada fitrah.

Antara inisiatif yang telah dilaksanakan oleh JAKIM menyantuni dan membantu golongan LGBT di Malaysia adalah melalui beberapa pendekatan seperti berikut:

**(a) Penubuhan Taskforce Menangani Isu LGBT**

Taskforce ini merupakan suatu platform yang diwujudkan selaras dengan pembentukan **Pelan Tindakan Sosial Islam** Jabatan Kemajuan Islam Malaysia (PTSI JAKIM) 2019-2025. Pelan ini merupakan antara usaha untuk menangani gejala sosial dalam kalangan masyarakat Islam di Malaysia.

**(b) Pelaksanaan Program**

**i) Mukhayyam atau Kem Ibadah**

Program ini dilaksanakan dengan objektif untuk membimbing dan memberikan kesedaran kerohanian/spiritual terhadap golongan LGBT melalui pendekatan agama (tauhid) untuk memberikan pendedahan dan bimbingan ilmu fardu ain dan pengetahuan serta kesedaran berkaitan kesihatan khususnya HIV.

**ii) Program Susulan dan Sokongan**

Program Susulan dan sokongan ini merupakan aktiviti susulan seperti usrah dan kelas pengajian serta bantuan modal awal perniagaan untuk ekonomi sara diri melalui inisiatif komuniti sendiri atau agensi-agensi seperti JAKIM, Majlis Agama Islam Negeri-negeri (MAIN), Jabatan Agama Islam Negeri-negeri (JAIN), dan Pertubuhan Bukan Kerajaan (NGO).

**iii) Program Pendidikan dan Advokasi Berkaitan Isu LGBT**

Program yang dilaksanakan adalah berbentuk seminar yang mensasarkan masyarakat awam termasuk pelajar-pelajar sekolah, universiti awam dan swasta (UA/US), kaunselor sekolah/UA/US, ibu bapa, sukarelawan sosial Islam, staf kesihatan dan wakil NGO sosial Islam. Seminar ini akan membincangkan isu LGBT dari aspek psikososial, psikologikal, psikospiritual dan kesihatan agar peserta mendapat maklumat dan kemahiran yang tepat bagi menghindari perlakuan LGBT serta membantu golongan yang terlibat untuk meninggalkan perlakuan LGBT. Program ini

turut melibatkan golongan LGBT yang dijemput sebagai ahli panel untuk sesi perkongsian.

**(C) Penubuhan Pusat Khidmat Sosial**

Pusat Khidmat Keluarga dan Sosial Komuniti (PKKSK) termasuklah *KSKCareCentre* yang diletakkan di bawah JAKIM merupakan pusat khidmat kaunseling syarie, terapi psikospiritual Islam dan Ilaj Syarie yang terletak di Masjid Tuanku Mizan Zainal Abidin yang dibuka kepada semua masyarakat awam dan memberikan perkhidmatan secara percuma.

**(d) Mewujudkan bahan-bahan penerbitan**

JAKIM dengan kerjasama Yayasan Ihtimam Malaysia (YIM) telah menerbitkan *e-book* Panduan Hijrah Diri bagi mereka yang mengalami permasalahan homoseksualiti yang boleh dimuat turun di *Google Playstore*, buku “Hadith Sahih Berkenaan Perlakuan LGBT” serta risalah “Memahami LGBT Daripada Perspektif Seorang Muslim”. Terkini, JAKIM juga sedang dalam usaha membangunkan Modul ‘Ilaj Wa Syifa’ (Rawatan dan Pemulihan) khusus bagi golongan Lesbian dan Gay (JAKIM, 2020).

Untuk makluman Ahli Yang Berhormat, sehingga Oktober 2020 seramai 1,733 peserta di kalangan golongan LGBT yang telah mengikuti Program Mukhayyam JAKIM dengan kerjasama Jabatan Agama Islam Negeri-Negeri dan agensi seperti Kementerian Kesihatan Malaysia dan Majlis Agama Islam Negeri-Negeri serta Pusat Zakat. Di samping itu, terdapat dua belas (12) NGO Komuniti Hijrah daripada golongan LGBT yang beragama Islam yang berjaya ditubuhkan. Mengenai jumlah sebenar golongan LGBT di dalam negara, JAKIM tidak mempunyai data berkenaan.

Sekian, terima kasih.